

Muhamed Tuno, geod.inž.



Sa iznenađenjem i žaljenjem smo primili vijest da nas je naš kolega Tuno (Halima) Muhamed 25.10.2011. god. u svojoj 70. godini iznenada zauvijek napustio.

Muhamed Tuno rođen je u Sarajevu u staroj vratničkoj porodici 15.11.1941. god. U rodnom gradu je završio osnovnu školu i gimnaziju. Iz ekonomskih i porodičnih razloga napušta započete studije na Ekonomskom fakultetu i upisuje Višu geodetsku školu u Sarajevu, na kojoj uspješno diplomira 1972. god. i stiče zvanje geodetskog inženjera. Godine 1986. položio je stručni ispit u svom stručnom zvanju.

Kompletan radni vijek proveo je u Geodetskom zavodu na raznim operacijama i kao izvođač i kao pregledač. Specijalizirao se za osnovne radove a naročito na rješavanju i određivanju veznih tačaka. Iza njega su ostali uspješni rezultati u opštinama Travnik, Donji Vakuf, Neum, Zenica, Bugojno, Velika Kladaša, Vareš, Foča, Bosanska Krupa, Sanski Most, Konjic, Sokolac, Pale, Brčko, Žepče, Teslić, Prozor, Kupres ...

Bio je od onih kolega koji je više volio rad na terenu nego u birou. Nesebično je svoje iskustvo prenosio na mlađe kolege. Nije bilo tako zahtjevnog normativa koji Muhamed nije sa lakoćom ostvarivao a najčešće i višestruko prebacivao. Ratno vrijeme 1992.-1995. godine proveo je u Sarajevu radeći na terenu ne plašeći se granatiranja. Najviše je snimao gasne instalacije koje su se u gradu tada intenzivno polagale a u najopasnijim kvartovima zaštitu su mu ponekad pružale snage UNPROFOR-a. Nije mu bilo teško što je skoro svakodnevno od svoje kuće do Zavoda i nazad pješao i preko 20 km. Nakon rata jedan od većih geodetskih zadataka je bio obnavljanje geodetske mreže u Sarajevu i tu je naš Tuno (uglavnom smo ga tako zvali) dao veliki doprinos. Krajem 2006. godine otišao je u zasluženu penziju.

Na terenu u Foči upoznao je i svoju suprugu Džemailu - Džemku. Iz tog skladnog braka rodio im se sin jedinac Nedim.

Muhamed je bio pasionirani ribolovac i član mnogih ribolovačkih udruženja. Skoro uvijek ga je pratio njegov ljubimac. Kad je malo porastao krenuo je uz oca po terenu kao pomoćni radnik, upisao Geodetsku školu i završio je sa odličnim uspjehom kao učenik generacije. Nedimova supruga Muvedeta je također završila Geodetsku školu i oboje su nastavili studije i postali diplomirani inženjeri. Najveća radost Muhamedova je bila kada su mu se rodile unuke - bliznakinje Amina i Velida. Doživio je tu radost da mu sin bude magistar geodezije i viši asistent na Geodetskom odsjeku Građevinskog fakulteta u Sarajevu.

Muhamedova sestra Bahrija i brat Ahmed imali su u Muhamedu podršku kad god je to trebalo.

Muhamedovoj dženazi koja je obavljena na Grlića brdu nedaleko od njegove kuće, prisustvovao je veliki broj kolega i kolegica, rodbine i komšija.

Za sve što je doprinio za razvoj i dobrobit naše Bosne i Hercegovine možemo samo reći počivaj u miru i mnogo Ti hvala.

Mirsad Bakšić